

Pregled Dokumentata| Broj 11/21

Početna (/) / Dokumenti (/Docs/) / Službene novine Kantona Sarajevo (/Docs/Drzavni) / Dokumenti pregled

Službene novine Kantona Sarajevo, broj 11/21

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), člana 25. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04) i člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18), Općinski Načelnik donosi

PRAVILNIK

O KRITERIJIMA I RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI ZA TROŠKOVE LIJEČENJA LICIMA U STANJU SOCIJALNE POTREBE

Član 1.

(1) Ovim Pravilnikom o kriterijima i raspodjeli novčanih sredstava za dodjelu jednokratne novčane pomoći za troškove liječenja licima u stanju socijalne potrebe (u daljem tekstu Pravilnik) uređuju se kriteriji i način dodjele jednokratne novčane pomoći za liječenje licima u stanju socijalne potrebe.

(2) Pravo se ostvaruje jednom u toku kalendarske godine.

Član 2.

Cilj novčanih davanja utvrđenih ovim Pravilnikom je uključivanje lokalne zajednice u sistem zdravstvene zaštite i brigu o zdravlju njenih građana.

Član 3.

Poslove u vezi ostvarivanja prava propisanih ovim Pravilnikom obavlja općinska služba nadležna za poslove socijalne zaštite.

Član 4.

(1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće budžetske godine ili do utroška planiranih budžetskih sredstava.

(2) Jednokratna novčana pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.

(3) Zahtjevi za ostvarivanje prava na jednokratnu novčanu pomoć podnose se službi nadležnoj za poslove socijalne zaštite

putem protokola Općine.

(4) Zahtjevi će se rješavati po redosljedu podnošenja.

(5) Služba je dužna u roku od 30 dana od dana podnošenja riješiti zahtjev i o tome obavijestiti podnosioca.

(6) Dokumentacija koju je potrebno priložiti uz zahtjev po objavljenom javnom pozivu biti će navedena u posebnom obrascu koji će biti dostupan na web stranici te info-pultu Općine Centar Sarajevo. Zahtjev za ostvarivanje prava čini sastavni dio ovog Pravilnika i isti se može mijenjati neovisno od odredaba Pravilnika.

Član 5.

Uvjeti za ostvarivanje prava utvrđenih ovim Pravilnikom su:

- a) da podnositelj zahtjeva ima prebivalište na području općine Centar Sarajevo u trajanju od najmanje jedne godine do dana podnošenja zahtjeva ili boravište po osnovu statusa raseljenog lica;
- b) da ukupna mjesečna primanja porodičnog domaćinstva ne prelaze iznos jedne i po prosječne plaće ostvarene u FBiH prema posljednjim statističkim pokazateljima,

Član 6.

Lice koje ispunjava uvjete utvrđene članom 5. ovog Pravilnika može ostvariti jedno od sljedećih prava:

- a) Pravo na sufinansiranje troškova banjskog liječenja na osnovu preporuke nadležne zdravstvene ustanove u visini iznosa razlike između cijene usluga banjskog liječenja i sredstava participacije koje odobrava Zavod zdravstvenog osiguranja Kantona Sarajevo, u maksimalnom iznosu do 1.000,00 KM;
- b) Pravo na novčanu pomoć za kupovinu lijekova koji se ne nalaze na esencijalnoj listi lijekova, na osnovu preporuke ljekara specijaliste, subspecijaliste ili konzilija, za najduže tri mjeseca liječničkog tretmana, u maksimalnom iznosu do 800,00 KM;
- c) Pravo na novčanu pomoć za kupovinu preparata za podizanje imuniteta za oboljele od karcinoma, na osnovu preporuke ljekara porodične medicine, u maksimalnom iznosu do 300,00 KM;
- d) Pravo na sufinansiranje troškova nabavke ortopedskog i drugog pomagala na osnovu preporuke nadležne zdravstvene ustanove i dokaza o participaciji od strane Zavoda zdravstvenog osiguranja Kantona Sarajevo, u visini iznosa razlike između cijene pomagala i sredstava kojima participira Zavod, u maksimalnom iznosu do 800,00 KM;
- e) Pravo na sufinansiranje rukava za limfedem na osnovu preporuke ljekara onkologa ili fizijatra i predračuna od strane ovlaštenog dobavljača medicinskih sredstava, u maksimalnom iznosu do 500,00 KM;
- f) Pravo na sufinansiranje tretmana djeci kojoj je dijagnosticiran psiho-fizički poremećaj u razvoju, u maksimalnom iznosu do 500,00 KM;
- g) Pravo na sufinansiranje troškova nabavke ortopedskog pomagala - silikonski implantat za augmentaciju i rekonstrukciju dojke za žene koje su operisane od karcinoma dojke, na osnovu preporuke ljekara specijaliste i predračuna od strane ovlaštenog dobavljača medicinskih sredstava, u maksimalnom iznosu do 1.000,00 KM.
- h) Pravo na sufinansiranje troškova nabavke ortopedskog pomagala - funkcionalna proteza silikonska (prsna proteza sa dodatnom opremom i specijalni grudnjak) za žene koje su operisane od karcinoma dojke i nisu zdravstveno osigurane, na osnovu preporuke ljekara specijaliste i predračuna od strane ovlaštenog dobavljača medicinskih sredstava, u maksimalnom iznosu do 300,00 KM.

Član 7.

Ostala prava

Izuzetno od uvjeta propisanog članom 5. tačka b) ovog Pravilnika, bez obzira na visinu primanja porodičnog domaćinstva, utvrđuju se sljedeća prava:

- a) Pravo na jednokratnu novčanu pomoć za nabavku lijekova za oboljele od leukemije, hepatitisa B i C i drugih teških bolesti, raspoređuje se po pojedinačnom slučaju, na osnovu preporuke Kliničkog centra Univerziteta u Sarajevu ili Opće bolnice "Dr. Abdulah Nakaš" i predračuna apoteke, u iznosu do 30% od ukupnih troškova liječenja na godišnjem nivou, u maksimalnom iznosu do 5.000,00 KM;
- b) Pravo na sufinansiranje bezglutenske ishrane, po preporuci nadležnog ljekara, u maksimalnom iznosu do 2.500,00 KM;
- c) Pravo na jednokratnu novčanu pomoć za finansiranje troškova posebne ishrane i drugih tretmana preporučenih od strane ljekara djeci do 15. godina starosti kojoj je dijagnosticiran diabetes mellitus, u maksimalnom iznosu do 1.000,00 KM;
- d) Pravo na jednokratnu novčanu pomoć za lica koja zbog nemogućnosti liječenja u BiH, imaju preporuku za liječenje u inostranstvu izdatu od strane konzilija ljekara Kliničkog centra Univerziteta u Sarajevu, JU Opća bolnica "Dr. Abdulah Nakaš" ili ugovoren tretman za liječenje van mjesta prebivališta i to u iznosu 50% od predračunske vrijednosti troškova liječenja, a u maksimalnom iznosu do 2.500,00 KM.

Član 8.

- (1) Licima koja ostvare pravo na jednokratnu novčanu pomoć za liječenje, uplata sredstava izvršit će se putem nadležne službe za finansije na tekući račun apoteka po predračunu (za prava utvrđena članom 6. tačka b), c) i članom 7 a), račun ovlaštenog dobavljača pomagala po predračunu (za prava utvrđena članom 6 tačka d), e), g) i h), račun zdravstveno-rehabilitacione ustanove po predračunu (za pravo utvrđeno članom 6 tačka a), račun korisnika prava (za prava utvrđena članom 7 tačka b) i d) i račun roditelja/zakonskog zastupnika lica koje je ostvarilo pomoć (za prava utvrđena članom 6 tačka f) i članom 7. tačka c).
- (2) Korisnici prava na jednokratnu novčanu pomoć obavezuju se da u roku od 90 dana od dana dodjele sredstava odnosno do kraja tekuće budžetske godine u kojoj su ostvarili pravo dostave original ili ovjerene kopije fiskalnih računa na osnovu kojih će dokazati svrsishodnost utroška sredstava.
- (3) Korisnici koji ne budu u naprijed utvrđenom roku opravdali dodijeljena sredstva biti će u obavezi ista vratiti na račun Općine Centar Sarajevo najkasnije u roku koji će biti utvrđen posebnim aktom, u suprotnom će se sredstva potraživati putem nadležnog suda.
- (4) Ukoliko korisnik sredstava ne dostavi dokaz sa svom pratećom dokumentacijom o namjenskom utrošku sredstava on i članovi njegovog porodičnog domaćinstva neće više moći ostvarivati pravo na jednokratnu novčanu pomoć putem službe iz člana 3. ovog Pravilnika.

Član 9.

- (1) O podnesenom zahtjevu nakon utvrđenih činjenica, prijedlog i mišljenje daje služba, a Zaključak o dodjeli jednokratne novčane pomoći donosi Općinski načelnik.
- (2) Ukoliko se utvrdi da nisu ispunjeni uvjeti za ostvarivanje prava na jednokratnu novčanu pomoć u skladu sa odredbama ovog Pravilnika, podnosilac zahtjeva će o tome biti obaviješten aktom nadležne službe.

Član 10.

(1) Pripadnici boračke populacije mogu ostvariti pravo na jednokratnu novčanu pomoć u skladu sa kriterijima ovog Pravilnika pod uvjetom da isto pravo nisu ostvarili putem odsjeka za boračko-invalidsku zaštitu.

(2) Penzioneri koji su ostvarili pravo na jednokratnu novčanu pomoć utvrđenu članom 6. tačka b) ovog Pravilnika ne mogu ostvariti pravo na jednokratnu novčanu pomoć za kupovinu lijekova penzionerima sa područja općine Centar Sarajevo.

Član 11.

Izuzetno od odredaba ovog Pravilnika, Općinski načelnik može odobriti jednokratnu novčanu pomoć za troškove liječenja ukoliko se radi o pokrenutoj humanitarnoj akciji za liječenje oboljelog lica, u maksimalnom iznosu do 2.500,00 KM.

Član 12.

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo", a isti će biti objavljen i na Oglasnoj ploči i web stranici Općine Centar Sarajevo.

Član 13.

Stupanjem na snagu ovog Pravilnika prestaje da važi Pravilnik o raspodjeli novčanih sredstava za dodjelu jednokratne novčane pomoći za troškove liječenja licima u stanju socijalne potrebe broj: 09/B-49-1712/18 od 27.09.2018. godine i Pravilnik o izmjenama i dopunama Pravilnika o raspodjeli novčane pomoći za troškove liječenja licima u stanju socijalne potrebe 09/B-14-1977/19 od 13.05.2019. godine.

Broj 10-03-41/21
04. marta 2021. godine
Sarajevo

Općinski načelnik
Srđan Mandić, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa